



Približavanje Allahu najvrednijim djelima u odabranim vremenima (Meka)

Hatib: dr. Bender ibn Abdulaziz Belile

8. zul-hidždže 1445. po Hidžri / 14. juli 2024.

Hvala Allahu, Onome Koji ukazuje Svoju pomoć i podršku kome hoće od Svojih robova. On nas je uputio na najbolji vjerozakon i najispravniji put. Svjedočim da nema boga osim Allaha, Jedinog, Koji nema druga, Koji je pozvao Svoje robove i oni su se odazvali Njegovom pozivu iz najudaljenijih mjesta, i svjedočim da je naš prvak Muhammed, sallallahu alejhi ve sellem, Njegov rob i poslanik, najljepšeg morala i čistog porijekla, neka su Allahova milost, blagoslov i spas na njega, na njegovu porodicu i ashabe, dostojne svakog dobra i potvrđivanja istine.

Oporučujem sebi i vama bogobožnost. Bojte se Allaha, Allah vam se smilovao, jer će On zaštititi svakoga onoga ko Ga se bude bojao, dat će mu izlaz iz svake situacije, olakšat će mu sve poslove, ispunit će njegove želje i odvratit će od njega zlo.

O vjernici, vrijeme je "obišlo" svoj krug i natkrilili su vas najbolji dani svijeta, prvih deset dana zul-hidžeta, čiju je vrijednost i status Allah, džellešanuhu, uzvisio, tako da ste se napojili iz njegovog slatkog i nepresušnog izvora, čineći najbolja, najčišća i najuzvišenija djela, a Gospodar ih je prihvatio od vas upravo onako kako vam ih je i predao, s najljepšim kabulom i potpunim zadovoljstvom. Ovi blagoslovljeni dani samo što vas nisu napustili, ostala je tek jedna njihova trećina, a kako ne bi bili uzvišeni kad je u njima ovaj "vaš" dan, Jevmut-tervije, dan opskrbljivanja hadžija vodom, koji pada na petak (džumu), za koji je Allahov Poslanik, sallallahu alejhi ve sellem, rekao da je "najbolji dan u kojem je sunce izašlo..." (Muslim), a nakon njega je Dan Arefata, u kojem je Allah usavršio vjeru i upotpunio Svoje blagodati prema najodabranijem Poslaniku: "Sada sam vam vjeru vašu usavršio i blagodat Svoju prema vama upotpunio i zadovoljan sam da vam islam bude vjera" (El-Maida, 3), i na kraju Jevmun-nahr, Dan klanja kurbana. A, znaš li ti šta je to Jevmun-nahr? Dan





Velikog hadža. Ibn Omer, radijallahu anhumu, prenosi da je Vjerovjesnik, sallallahu alejhi ve sellem, dok je obavljao hadž, stao između džemreta i rekao: "Ovo je Dan Velikog hadža." (Buhari) To je, također, najuzvišeniji dan kod Allaha, prema riječima Vjerovjesnika, sallallahu alejhi ve sellem: "Najuzvišeniji dan kod Allaha je Jevmun-nahr." (Ebu Davud) Allah se zaklinje ovim danom i Danom Arefata, nakon što se zakleo sa deset dana, zbog njihove pozicije i vrijednosti kod Njega, pa je rekao: "i parnih i neparnih". Poslanik, sallallahu alejhi ve sellem, rekao je: "Tako Mi zore, i deset noći" (el-Fedžr, 3) – deset noći je deset dana zul-hidžeta, neparni je Dan Arefata, a parni Jevmun-nahr." (Ahmed i Nesai)

O muslimani, hodočašćenje časne Božije Kuće je uzvišeni obred, u kojem se brišu i nestaju sve razmirice, razilaženja i parole, a duše se okreću Gospodaru Zemlje i nebesa. Nema mjesta za hvalisanje rasom i nacijom, i u njemu niko nema nikakve prednosti nad drugima osim po bogobožnosti, jer je to najbolja odjeća. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Allah je otklonio od vas pagansku nadmenost i hvalisanje porijeklom. Ili si bogobožni vjernik ili si pokvareni grešnik. Ljudi su sinovi Ademovi, a Adem je od zemlje." (Ahmed i Ebu Davud)

Jedina mjera na Allahovoj vagi jeste bogobožnost. Uzvišeni kaže: "O ljudi, Mi vas od jednog čovjeka i jedne žene stvaramo i na narode i plemena vas dijelimo da biste se upoznali. Najugledniji kod Allaha je onaj koji Ga se najviše boji, Allah, uistinu, sve zna i nije Mu skriveno ništa." (El-Hudžurat, 13) Ebu Nadra, radijallahu anhu, rekao je: "Oni koji su slušali Poslanikov govor u danima tešrika, pričali su mi da je rekao: 'O ljudi, vaš Gospodar je jedan i vaš otac je jedan. Arap nema prednost nad nearapom, niti nearap nad Arapom, niti crveni nad crnim, niti crni nad crvenim, osim po bogobožnosti.'" (Ahmed)

Istinska vrijednost u ovoj uzvišenoj vjeri jeste ono što se nalazi u srcu i što potvrdi djelo. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Allah ne gleda u vaše likove, niti u vaš imetak, nego gleda u vaša srca i vaša djela." (Muslim)





O vjernici, opskrbite se, a najbolja opskrba je bogobožnost, i čvrsto se držite užeta vjere i džemata (zajednice), jer je Allahova ruka nad džematom, a onaj ko se odvoji od džemata, odvojio se u Vatru, da nas Allah sačuva!

Najuzvišeniji principi na kojima se zasnivaju hadžski obredi i svi oblici pokornosti i ibadeta jesu ostvarivanje tevhida – čiste, iskrene i neiskrivljene vjere u jednog Boga, iskazivanje predanosti i pokornosti Allahu kroz ibadet i odricanje od višeboštva i njegovih sljedbenika. Ibn Tejmijja je rekao: "Tevhid je osnova vjere, bez koje Allah ne prihvata vjeru onih prvih i potonjih, s njom je poslao poslanike i objavio knjige, kao što kaže Uzvišeni: 'Pogledaj u odredbama objavljenim poslanicima Našim, koje smo prije tebe slali, da li smo naredili da se, mimo Milostivog, klanjaju božanstvima nekakvim' (Ez-Zuhruf, 45); 'Prije tebe nijednog poslanika nismo poslali a da mu nismo objavili: Nema boga osim Mene, zato se Meni klanjajte!' (El-Enbija, 25)."

Tevhid je dobro djelo kojem nije ravno nijedno drugo dobro djelo, i pobožnost kojoj nije ravna nijedna druga pobožnost. Dobro djelo tevhida briše, čisti i iskupljuje loša djela i grijeha. Abdullah ibn Mesud, radijallahu anhu, rekao je: "Kada je Poslanik, sallallahu alejhi ve sellem, uzdignut na nebo u noći Israa i Miradža, date su mu tri stvari: pet dnevnih namaza, završnica sure El-Bekara i oprost velikih grijeha onim pripadnicima njegovog ummeta koji Allahu ne pripisuju druga." (Muslim)

Poslanik, sallallahu alejhi ve sellem, u ovom hadisu nazvao je velike grijeha "mukhimat", tj. grijesi koji upropaštavaju čovjeka i uvode ga u Vatru.

O vjernici, nastojte i trudite se da u potpunosti ostvarite tevhid, čuvajte se svega onoga što će zamutiti njegovu čistoću, držite se sunneta, klonite se sljedbenika strasti i zabludjelih novotarija. Ibadet se ne upućuje nikome drugom osim Allahu, ni bliskom meleku, ni odabranom vjerovjesniku, a kamoli nekome ko je na manjem stepenu od njih, evlijama i dobrim ljudima, koji ne mogu sebi nikakvu korist pribaviti niti od sebe štetu otkloniti, niti dati smrt, niti život, niti proživljenje.





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJJE
KOJU TOKOM HUTBE ELABORIRA." (PREPOROD)

HUTBE 

Zahvaljujte Allahu na ovoj velikoj blagodati, i borite se za nju, makar i protiv svojih duša, jer koliko uspijete ostvariti i upotpuniti ovu osnovu vjere kod sebe, toliko je vaša pozicija kod vašeg Gospodara.

Donosite salavate i selame na najbolje Allahovo stvorenje, Muhammeda, sina Abdullahovog, On vam je to naredio u Svojoj Knjizi, rekavši: "Allah i meleki Njegovi blagosilju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

